

## ՀՀ ֆինանսների նախարարություն

### Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 2/4

19 հունվարի 2016 թ.

Քննարկվեց քաղաքացի Էդուարդ Արսենյանի 23.12.2015 թ-ի գանգատը ՀՀ ՖՆ իրավաբանական վարչության պետի 15.12.2015 թ-ի թիվ 308432/02 որոշման դեմ:

#### **Քաղաքացի Էդուարդ Արսենյանի գանգատում բերված փաստարկները.**

ՀՀ վարչական իրավախախտումների վերաբերյալ ՀՀ օրենսգրքի 37 հոդվածի համաձայն. «Վարչական տույժը կարող է նշանակվել իրավախախտումը կատարվելու օրվանից ոչ ուշ, քան երկու ամսվա ընթացքում, իսկ շարունակվող և տևող իրավախախտման դեպքում՝ այն բացահայտվելու օրվանից երկու ամսվա ընթացքում, բացառությամբ սույն հոդվածով նախատեսված դեպքերի»:

Տվյալ դեպքում խախտումը շարունակվող և տևող չէ, քանի որ նույն օրենսգրքի 169.1 հոդվածի համաձայն տուգանքի նշանակման համար հիմքը համարվում է հաշվարկը հարկային մարմիններ սահմանված ժամկետում չներկայացնելը, այլ ոչ թե սահմանված ժամկետից հետո չներկայացնելը կամ սահմանված ժամկետից հետո ուշացնելը, ինչի դեպքում խախտումը կլիներ շարունակվող:

Հարկ է նշել նաև, որ խախտումը վերաբերում է «ԼԼ Բիմբո» ՍՊԸ եկամտային հարկի և սոցիալական վճարի հույիս ամսվա հաշվարկի ուշ ներկայացնելուն, որը պետք է ներկայացվեր մինչև սույն թվականի օգոստոսի 21-ը: Այս դեպքում խախտումը ունի կոնկրետ կատարման օր (հաշվարկը հարկային մարմիններ ներկայացնելու սահմանված ժամկետ), այն է՝ օգոստոսի 21-ը, ուստի խախտումը կատարվել է կոնկրետ այդ օրը և հարկային մարմինն այդ օրն իսկ պետք է հայտնի լիներ նշված խախտման մասին: Սակայն խախտումը կատարվելուց մինչև վարչական տույժ նշանակելու որոշումն անցել է ավելի քան երկու ամիս:

Ելնելով վերոգրյալից՝ գանգատաբերը խնդրում է վերացնել ՀՀ ՖՆ իրավաբանական վարչության պետի 2015թ-ի դեկտեմբերի 15-ի թիվ 308432/02 որոշումը:

#### **ՀՀ ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.**

ՀՀ ՖՆ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ՖՆ իրավաբանական վարչության պետը, քննելով 15.12.2015 թ-ի 2968 վարչական իրավախախտման վերաբերյալ արձանագրությունը և կից նյութերը պարզել է, որ «ԼԼ Բիմբո» ՍՊԸ հաշվապահ Էդուարդ Արսենյանը սահմանված ժամկետում չի ներկայացրել 2015 թ-ի հույիս ամսվա եկամտային հարկի և սոցիալական վճարի հաշվարկը, որի համար նախատեսված է պատասխանատվություն: Նկատի ունենալով, որ արարքը նախատեսված է «Վարչական իրավախախտումների վերաբերյալ» ՀՀ օրենսգրքի 169.1-րդ հոդվածի 2-

րդ մասով, ուստի ղեկավարվելով նույն օրենսգրքի 32-րդ հոդվածի 2-րդ մասով, 244.2-րդ, 281-րդ հոդվածներով և 282-րդ հոդվածի 1-ին կետով ՀՀ ՖՆ իրավաբանական վարչության պետի կողմից 15.12.2015 թ-ին ընդունվել է թիվ 308432/02 որոշումը (այսուհետ նաև Որոշում) Էդուարդ Արսենյանի նկատմամբ վարչական տույժ նշանակելու մասին՝ գումարով 20.000 դրամի չափով:

Սույն գործում առկա ապացույցների ուսումնասիրության արդյունքում Հանձնաժողովը եկավ եզրակացության, որ Որոշումը կայացվել է «Վարչական իրավախախտումների վերաբերյալ» ՀՀ օրենսգրքով նախատեսված պահանջների խախտմամբ, հետևյալ պատճառաբանությամբ.

«Վարչական իրավախախտումների վերաբերյալ» ՀՀ օրենսգրքի 37-րդ հոդվածի համաձայն. «Վարչական տույժը կարող է նշանակվել իրավախախտումը կատարվելու օրվանից ոչ ուշ, քան երկու ամսվա ընթացքում, իսկ շարունակվող և տևող իրավախախտման դեպքում՝ այն բացահայտվելու օրվանից երկու ամսվա ընթացքում, բացառությամբ սույն հոդվածով նախատեսված դեպքերի»:

Էդուարդ Արսենյանը վարչական պատասխանատվության է ենթարկվել 2015 թ-ի հուլիս ամսվա եկամտային հարկի և պարտադիր կուտակային վճարի ամսական ամփոփ հաշվարկը սահմանված ժամկետում չներկայացնելու համար:

«Եկամտային հարկի մասին» ՀՀ օրենքի 13-րդ հոդվածի 2-րդ մասի համաձայն հարկային գործակալները պարտավոր են յուրաքանչյուր ամսվա համար այդ ամսվան հաջորդող ամսվա 20-ից ոչ ուշ բացառապես էլեկտրոնային եղանակով հարկային մարմին ներկայացնել եկամտային հարկի ամփոփ հաշվարկ:

Քննարկվող դեպքում Էդուարդ Արսենյանի կողմից իրավախախտումը կատարվել է 2015 թ-ի օգոստոսի 20-ին, սակայն վարչական տույժը նշանակվել է միայն 2015 թ-ի դեկտեմբերի 15-ին: Այսինքն՝ վարչական տույժը նշանակվել է «Վարչական իրավախախտումների վերաբերյալ» ՀՀ օրենսգրքի 37-րդ հոդվածով նախատեսված ժամկետի խախտմամբ, այն է՝ իրավախախտումը կատարվելու օրվանից երկու ամիս հետո ընկած ժամանակահատվածում:

Ելնելով վերոգրյալից՝ Հանձնաժողովը գտնում է, որ Էդուարդ Արսենյանի գանգատը ենթակա է բավարարման:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

**ո Ր Ո Շ Ո Ւ Մ Է՝**

Բեկանել ՀՀ ՖՆ իրավաբանական վարչության պետի 15.12.2015 թ-ի թիվ 308432/02 որոշումը, իսկ գործը՝ կարճել:

**Հանձնաժողովի նախագահ՝**



**Վ.ՄԻՐՈՒՄՅԱՆ**